

ՊԱՅՄԱՆԱԳԻՐ N ՀՀՀ-ՄԱԾԶԲ-22/132-Պ

ք. Երևան

23-ը դեկտեմբերի 2022թ.

«Հայաստանի հանրային հեռուստաընկերություն» փակ բաժնետիրական ընկերությունը (այսուհետ՝ Պատվիրատու), ի դեմս գործադիր տնօրեն Հովհաննես Մովսիսյանի, ով գործում է ընկերության Կանոնադրության հիման վրա, մի կողմից, և

«Թայմ Պլուս» սահմանափակ պատասխանատվության ընկերությունը, (այսուհետ՝ Կատարող), ի դեմս տնօրեն Հարություն Գրիգորյանի, ով գործում է կանոնադրության հիման վրա, մյուս կողմից,

(այսուհետ յուրաքանչյուրն առանձին՝ Կողմ, միասին՝ Կողմեր),
կնքեցին սույն պայմանագիրը (այսուհետ՝ Պայմանագիր) հետևյալի մասին.

1. ՊԱՅՄԱՆԱԳՐԻ ԱՌԱՐԿԱՆ ԵՎ ԸՆԴՀԱՆՈՒՐ ՊԱՅՄԱՆՆԵՐԸ

- 1.1. Սույն Պայմանագրով Կատարողը պարտավորվում է Պատվիրատուի պատվերով նկարահանել «Եվրատեսիլ 2022» երգի միջազգային մրցույթի շրջանակներում դեկտեմբերի 06-ին և 07-ին կայացած մրցույթի մասնակից պատվիրակությունների համար նախատեսված Երևանի մետրոպոլիտենի թվով 5 կայարաններում տեղի ունեցած ժամանցային/մշակութային ծրագրի վերաբերյալ վավերագրական ֆիլմ (այսուհետ՝ Ֆիլմ) և սույն Պայմանագրով սահմանված կարգով և Կողմերի կողմից համաձայնեցված ձևաչափով և եղանակով հանձնել Պատվիրատուին (այսուհետ՝ Ծառայություններ), իսկ Պատվիրատուն պարտավորվում է ընդունել մատուցված Ծառայությունները և վճարել դրանց դիմաց՝ սույն Պայմանագրով սահմանված կարգով, չափով և ժամկետում:
- 1.2. Սույն Պայմանագրով սահմանված Ծառայությունները ներառում են ֆիլմի նկարահանման և մոնտաժման համար անհրաժեշտ և բավարար բոլոր աշխատանքների իրականացումը, այդ թվում նաև դրանց համար անհրաժեշտ բոլոր միջոցների ապահովումը:
- 1.3. Ֆիլմի նկարագիրը Կատարողի կողմից պետք է նախապես համաձայնեցվի Պատվիրատուի հետ:
- 1.4. Ֆիլմի նկատմամբ բոլոր բացառիկ գույքային իրավունքները ՀՀ օրենսդրությամբ նախատեսված առավելագույն ծավալով, առանց տարածքային սահմանափակման և համապատասխան իրավունքների գործողության ամբողջ ժամանակահատվածում, պատկանում են Պատվիրատուին: Սույն կետով նախատեսված իրավունքները ծագում են Կողմերի միջև համապատասխան հանձնման-ընդունման ակտի ստորագրման պահից:
- 1.5. Կատարողը երաշխավորում է, որ Ֆիլմը կպատրաստվի առանց անօրինական ներգործության կամ այլ ստեղծագործությունների անօրինական օգտագործման, այդ թվում՝ հանրահայտ և հանրամատչելի, և որ դրանց ստեղծման ժամանակ չեն օգտագործվի մտավոր գործունեության այնպիսի արդյունքներ, որոնք ստեղծվել կամ ստեղծվում են այլ պատվիրատուների համար, բացառությամբ այն դեպքերի, երբ այդպիսի օգտագործումն օրենքով սահմանված կարգով համաձայնեցված է իրավատերերի հետ և չի խախտում երրորդ անձանց իրավունքները:
- 1.6. Ֆիլմում Կատարողի կողմից օգտագործվող հեղինակային իրավունքի և հարակից իրավունքների օբյեկտների օգտագործման իրավաչափության համար պատասխանատվությունը կրում է Կատարողը:
- 1.7. Կատարողն ապահովում է իր հաշվին երրորդ անձանցից բոլոր անհրաժեշտ համաձայնությունների, թույլտվությունների ձեռքբերումը, և (կամ) նրանց հետ պայմանագրերի ստորագրումը և այլ անհրաժեշտ գործողությունների իրականացումը, որը պահանջվում է

- կիրառելի օրենսդրությամբ Ֆիլմի նկատմամբ բոլոր գույքային իրավունքների սույն Պայմանագրի համաձայն Պատվիրատուին փոխանցելու համար և որոնք բավարար կլինեն Ֆիլմը հետագայում Պատվիրատուի կողմից ցանկացած՝ օրենքին չհակասող եղանակով օգտագործելու համար:
- 1.8. Կողմերն արձանագրում են, որ Ֆիլմը ստեղծվում է բացառապես Պատվիրատուի պատվերով, և Կատարողն իրավունք չունի Ֆիլմի կամ նրա առանձին հատվածների մեջ հիշատակել այլ ընկերությունների, գերատեսչությունների կամ այլ մարմինների, հղումներ կատարել որևէ այլ ապրանքային կամ սպասարկման նշանի, որոնք Կատարողի կողմից կներկայացվեն որպես Ֆիլմի կամ դրա որևէ հատվածի ստեղծմանը աջակցություն ցուցաբերած անձինք, բացառությամբ այն դեպքերի, եթե այլ բան չի նախատեսվում Կողմերի լրացուցիչ գրավոր համաձայնությամբ: Սույն կետի խախտման դեպքում Պատվիրատուն իրավունք ունի պահանջել Կատարողից անհատույց վերացնել խախտումները, իսկ նշված պահանջը 3 (երեք) օրացուցային օրվա ընթացքում չկատարելու դեպքում, չընդունել Ֆիլմը և/կամ դրա համապատասխան մի մասը և պահանջել Կատարողից վնասների ամբողջական հատուցում:
 - 1.9. Կատարողը պարտավոր է ապահովել Ֆիլմի համապատասխանությունը ՀՀ քաղաքացիական օրենսգրքի, «Տեսալսողական մեդիայի մասին» ՀՀ օրենքի, «Հեղինակային և հարակից իրավունքների մասին» ՀՀ օրենքի և այլ կիրառելի իրավական ակտերի պահանջներին:
 - 1.10. Ծառայությունները մատուցվում են 2022թ.-ի դեկտեմբերի 23-ից մինչև 2022 թվականի դեկտեմբերի 26-ը ներառյալ:
 - 1.11. Կողմերը երաշխավորում և հավաստում են, որ իրավասու են ստորագրելու սույն Պայմանագիրը և ունեն սույն Պայմանագիրը կատարելու համար բոլոր անհրաժեշտ իրավունքները, թույլտվությունները, համաձայնությունները և միջոցները:

2. ՀԱՆՁՆՄԱՆ-ԸՆԴՈՒՆՄԱՆ ԿԱՐԳԸ

- 2.1. Սույն Պայմանագրով նախատեսված Ֆիլմը Կատարողը Կողմերի կողմից համաձայնեցված ձևաչափով և եղանակով Պատվիրատուին է ներկայացնում ոչ ուշ, քան Պայմանագրի գործողության վերջին օրը:
- 2.2. Ֆիլմը ստանալուց հետո 3 (երեք) աշատանքային օրվա ընթացքում Պատվիրատուի ներկայացուցիչը ստուգում է դրա սցենարի, տեխնիկական չափանիշների համապատասխանությունը Կատարողի հետ ձեռքբերված համաձայնություններին: Սույն կետով նախատեսված ստուգման արդյունքում թերություններ հայտնաբերելու դեպքում Ֆիլմը Պատվիրատուի կողմից չի ընդունվում, Պատվիրատուն անհապաղ տեղեկացնում է Կատարողին թերությունների մասին, որոնք ենթակա են անմիջապես վերացման վերջինիս կողմից անհապաղ:
- 2.3. Ծառայությունների մատուցումն արձանագրվում է հանձնման-ընդունման ակտի միջոցով: Կատարողը Ծառայությունների մատուցման ավարտից հետո 10 (տաս) աշխատանքային օրվա ընթացքում հանձնման-ընդունման ակտի հետ միասին Պատվիրատուին է ներկայացնում նաև իր կողմից հաստատված հաշիվ-վավերագիրը:
- 2.4. Պատվիրատուն առարկությունների բացակայության պարագայում դրանք ներկայացվելուց հետո 3 (երեք) աշխատանքային օրվա ընթացքում հաստատում է հանձնման-ընդունման ակտը և հաշիվ-վավերագիրը, կամ նույն ժամկետում տեղեկացնում է Կատարողին հայտնաբերված թերությունների և/կամ անհամաձայնությունների վերաբերյալ:
- 2.5. Այն դեպքում, եթե Պատվիրատուն 2.4 կետում նշված ժամկետում չի հաստատում հանձնման-ընդունման ակտը և Կատարողին չի ներկայացնում դրա հիմնավորումը, ապա հանձնման-ընդունման ակտը համարվում է հաստատված Պատվիրատուին ներկայացնելու ամսաթիվով և Պատվիրատուն պարտավորություն է կրում հաստատելու Կատարողի ներկայացրած հաշիվ-վավերագիրը և վճարելու դրանով նախատեսված գումարը:

3. ԿՈՂՄԵՐԻ ԻՐԱՎՈՒՆՔՆԵՐԸ ԵՎ ՊԱՐՏԱԿԱՆՈՒԹՅՈՒՆՆԵՐԸ

3.1. Պատվիրատուն իրավունք ունի՝

- 3.1.1. Օգտագործել ֆիլմը սեփական հայեցողությամբ, ինչպես նաև երրորդ անձանց արգելել կամ թույլատրել օգտագործել ֆիլմը՝ ՀՀ օրենսդրությամբ չարգելված ցանկացած եղանակով,
- 3.1.2. Կատարողից պահանջել սույն Պայմանագրով նախատեսված Ծառայությունները մատուցել ամբողջությամբ, պատշաճ որակով և սահմանված ժամկետում,
- 3.1.3. Հետևել Ծառայությունների մատուցման ընթացքին և որակին՝ առանց միջամտելու Կատարողի գործունեությանը՝ պահանջելով տրամադրել Ծառայությունների մատուցման ընթացքի և որակի վերաբերյալ Պատվիրատուին հետաքրքրող տեղեկատվությունը,
- 3.1.4. Սույն Պայմանագրով իր ակնկալած արդյունքին հասնելու նպատակով Կատարողին տալ Ծառայությունների մատուցմանը վերաբերելի ողջամիտ ցուցումներ,
- 3.1.5. Պահանջել Կատարողից աջակցել Պատվիրատուին Ծառայությունների մատուցման ընթացքը և որակը ստուգելիս, ինչպես նաև Ծառայություններն ընդունելիս,
- 3.1.6. Միակողմանիորեն լուծել սույն Պայմանագիրը և Կատարողից պահանջել հատուցել Պատվիրատուին պատճառված վնասները, եթե՝
 - I. Կատարողը խախտել է սույն Պայմանագրով, ինչպես նաև Կողմերի միջև համաձայնեցված ֆիլմի համար սահմանված բնութագիրը և ողջամիտ ժամկետում իր հաշվին չի շտկել նշված թերությունը կամ խախտման բնույթից ակնհայտ է, որ այն չի կարող շտկվել ողջամիտ ժամկետում,
 - II. Կատարողը սույն Պայմանագրով սահմանված ժամկետում չի ներկայացրել ֆիլմը,
 - III. Կատարողն այլ կերպ թույլ է տվել սույն Պայմանագրի էական խախտում:

3.2. Պատվիրատուն պարտավոր է՝

- 3.2.1. Ողջամտության սահմաններում Կատարողին ապահովել սույն Պայմանագրով սահմանված Ծառայությունների մատուցման համար անհրաժեշտ բոլոր պայմաններով, այդ թվում, բայց չսահմանափակվելով, նշանակել Պայմանագրի կատարման համար պատասխանատու կոնտակտային անձ, ով Կատարողի հետ կհամաձայնեցնի ֆիլմի փոխանցման ձևաչափը և եղանակը և սույն Պայմանագրի պատշաճ կատարման համար անհրաժեշտ այլ հարցեր, անհրաժեշտության պարագայում Կատարողի ներկայացուցիչներին տրամադրել ծրագրի անցկացման վայր մուտք գործելու հնարավորություն,
- 3.2.2. Սույն Պայմանագրով նախատեսված կարգով և ժամկետում ընդունել սույն Պայմանագրին համապատասխան Կատարողի կողմից պատրաստված ֆիլմը, իսկ թերություններ հայտնաբերելու դեպքում՝ այդ մասին հայտնել Կատարողին,
- 3.2.3. Վճարել Կատարողին պատշաճ մատուցված Ծառայությունների դիմաց՝ սույն Պայմանագրով սահմանված կարգով, չափով և ժամկետում:

3.3. Կատարողն իրավունք ունի՝

- 3.3.1. Ողջամտության սահմաններում Պատվիրատուից պահանջել ապահովել իրեն սույն Պայմանագրի կատարման համար անհրաժեշտ բոլոր պայմաններով,
- 3.3.2. Պատվիրատուից պահանջել սույն Պայմանագրով սահմանված կարգով և ժամկետում ընդունել պատշաճ մատուցված Ծառայությունները,
- 3.3.3. Պատվիրատուից պահանջել վճարել իր կողմից սույն Պայմանագրի պայմաններին համապատասխան ընդունված Ծառայությունների դիմաց՝ սույն Պայմանագրով սահմանված կարգով, չափով և ժամկետում:

3.4. Կատարողը պարտավոր է՝

- 3.4.1. Ինչպես սոցիալական մեդիա հարթակներում իր պաշտոնական էջերի միջոցով, այնպես էլ որևէ այլ հարթակներում առանց Պատվիրատուի նախնական գրավոր համաձայնության չտարածել որևէ տեղեկատվություն սույն Պայմանագրով մատուցվող Ծառայությունների վերաբերյալ, ներառյալ՝ Ֆիլմի գաղափարի, ներգրավված մասնակիցների, հեռարձակման ենթադրյալ ժամկետի կամ դրանց վերաբերող որևէ այլ հանգամանքի վերաբերյալ, չհրապարակել կադրեր նկարահանման գործընթացից, ինչպես նաև երաշխավորել Ծառայությունների մատուցման գործընթացում աշխատանքային, ծառայությունների մատուցման կամ որևէ այլ պայմանագրի հիման վրա ներգրավված անձանց կողմից այդպիսի տեղեկատվության գաղտնիության պահպանումը,
- 3.4.2. Ծառայությունները մատուցել անձամբ, սեփական ուժերով և միջոցներով: Ծառայությունների մատուցմանը Կատարողի կողմից երրորդ անձանց ներգրավելը հնարավոր է միայն Պատվիրատուի նախնական գրավոր համաձայնությամբ: Սույն կետի իմաստով երրորդ անձ է համարվում Կատարողի կողմից սույն Պայմանագրով սահմանված Ծառայությունների կամ դրա առանձին գործողությունների պատվիրակման դեպքում որպես կողմ հանդես եկող կոնտրագենտ(ներ)ը:
- 3.4.3. Ծառայությունները մատուցել պատշաճ որակով, ՀՀ օրենսդրության պահանջներին, ինչպես նաև Ծառայությունների մատուցումը կարգավորող կիրառելի նորմերին, կանոններին և ստանդարտներին համապատասխան,
- 3.4.4. Ծառայությունները մատուցել ամբողջությամբ, իսկ արդյունքները Պատվիրատուին հանձնել՝ սույն Պայմանագրով սահմանված ժամկետում և կարգով,
- 3.4.5. Հետևել սույն Պայմանագրի պայմանների սահմաններում Պատվիրատուի տված ողջամիտ ցուցումներին,
- 3.4.6. Աջակցել Պատվիրատուին Ծառայությունների մատուցման ընթացքը և որակը ստուգելիս, սույն Պայմանագրի 3.1.3 կետով սահմանված կարգով Պատվիրատուի համապատասխան պահանջը ստանալուց 1 (մեկ) աշխատանքային օրվա ընթացքում Պատվիրատուին տրամադրել Ծառայությունների մատուցման ընթացքի և որակի վերաբերյալ Պատվիրատուին հետաքրքրող տեղեկատվությունը,
- 3.4.7. Աջակցել Պատվիրատուին Ծառայություններն ընդունելիս,
- 3.4.8. Պատվիրատուի կողմից սահմանված ժամկետում անհատույց վերացնել Ծառայությունների մատուցման արդյունքներում հայտնաբերված թերությունները,
- 3.4.9. Որևէ ձևով չօգտագործել Ֆիլմը, կամ դրա մասը, ինչպես նաև երրորդ անձանց չտրամադրել նման օգտագործման թույլտվություն՝ առանց Պատվիրատուի նախնական գրավոր համաձայնության,
- 3.4.10. Ամբողջությամբ հատուցել Ֆիլմի պատրաստման ընթացքում իր կողմից երրորդ անձանց հեղինակային իրավունքի և հարակից իրավունքների կամ ՀՀ օրենսդրության այլ պահանջների խախտման հետևանքով Պատվիրատուի կրած բոլոր վնասները՝ ներառյալ բաց թողնված օգուտը:

4. ՊԱՅՄԱՆԱԳՐԻ ԱՐԺԵՔԸ ԵՎ ՎՃԱՐՄԱՆ ԿԱՐԳԸ

- 4.1. Սույն Պայմանագրով նախատեսված Ֆիլմի նկարահանման ընդհանուր արժեքը կազմում է 1 687 719.33 (մեկ միլիոն վեց հարյուր ութսույնյոթ հազար յոթ հարյուր տասնինը ամբողջ երեսուներեք հարյուրերորդական) ՀՀ դրամ՝ ներառյալ բոլոր կիրառելի հարկերը և Կատարողի կողմից իրականացվող ծախսերը:
- 4.2. Պայմանագրի 4.1 կետով սահմանված Ֆիլմի դիմաց Պատվիրատուն վճարում է անկանխիկ փոխանցմամբ՝ Կատարողի Պայմանագրում նշված բանկային հաշվեհամարին հանձնման-

ընդունման ակտի և հաշիվ-վավերագրի երկկողմանի հաստատվելուց հետո 5 (հինգ) աշխատանքային օրվա ընթացքում: Ընդ որում, սույն Պայմանագրի շրջանակներում հանձնման-ընդունման ակտի և հաշիվ-վավերագրի հաստատման օր է համարվում դրանց վրա Կողմերից վերջինի ստորագրության (կնիքի առկայության դեպքում նաև կնքման) օրը:

- 4.3. Վճարման ամսաթիվ է համարվում Պատվիրատուի բանկային հաշվից դրամական միջոցների ելքագրման ամսաթիվը: Բանկային ծախսերը Պատվիրատուի բանկում կատարում է Պատվիրատուն, իսկ Կատարողի բանկում՝ Կատարողը:

5. ԿՈՂՄԵՐԻ ՊԱՏԱՍԽԱՆԱՏՎՈՒԹՅՈՒՆԸ

- 5.1. Կողմերը պատասխանատվություն են կրում սույն Պայմանագրով նախատեսված պարտականությունների չկատարման կամ ոչ պատշաճ կատարման համար:
- 5.2. Պատվիրատուի պահանջով Կատարողն իր հաշվին, իր միջոցներով և Պատվիրատուի կողմից սահմանված ողջամիտ ժամկետում պարտավոր է վերացնել մատուցված Ծառայություններում իր մեղքով տեղ գտած թերությունները: Նշված թերությունները Պատվիրատուի սահմանած ողջամիտ ժամկետում չվերացվելու դեպքում Պատվիրատուն իրավասու է Կատարողից գանձել տուգանք՝ Ծառայությունների ընդհանուր արժեքի 10 (տաս) տոկոսի չափով, պահանջել իր կրած վնասների, ներառյալ, բայց չսահմանափակվելով, խախտված իրավունքները վերականգնելու համար կատարած ծախսերի և բաց թողնված օգուտի հատուցում և, ըստ հայեցողության, սույն Պայմանագրի 3.1.6 կետով սահմանված կարգով լուծել Պայմանագիրը:
- 5.3. Ֆիլմը հանձնելու սույն Պայմանագրով սահմանված ժամկետը խախտելու դեպքում Պատվիրատուն իրավունք ունի Կատարողից գանձել տույժ՝ կետանցի յուրաքանչյուր օրվա համար Ծառայությունների ընդհանուր արժեքի 0,13 (զրո ամբողջ տասներեք հարյուրերորդական) տոկոսի չափով և ըստ հայեցողության սույն Պայմանագրի 3.1.6 կետով սահմանված կարգով լուծել Պայմանագիրը:
- 5.4. Սույն Պայմանագրի 5.2. կետով նախատեսված տուգանքը, ինչպես նաև 5.3. կետով նախատեսված տույժը, կարող է հաշվարկվել և հաշվանցվել Կատարողին վճարման ենթակա գումարից:
- 5.5. Մատուցված Ծառայությունների դիմաց վճարելու սույն Պայմանագրով սահմանված ժամկետը խախտելու դեպքում Կատարողն իրավունք ունի Պատվիրատուից գանձել տույժ՝ կետանցի յուրաքանչյուր օրվա համար վճարման ենթակա գումարի 0,1 (զրո ամբողջ մեկ տասներորդական) տոկոսի չափով, բայց ոչ ավել, քան վճարման ենթակա գումարի 5 (հինգ) տոկոսը:
- 5.6. Կատարողը պարտավոր է Պատվիրատուին գերծ պահել երրորդ անձանց կողմից Պատվիրատուին ներկայացված ցանկացած այնպիսի պահանջից, վեճից, հայցից, որոնք Կատարողի կողմից սույն Պայմանագրով նախատեսված պարտականությունների կամ երաշխիքների խախտման արդյունք են, ինչպես նաև հատուցել նման պահանջի, վեճի կամ հայցի արդյունքում Պատվիրատուին պատճառված բոլոր վնասները՝ ներառյալ բաց թողնված օգուտը:
- 5.7. Տուժանքների վճարումը չի ազատում Կողմերին սույն Պայմանագրով ստանձնած պարտականությունների ամբողջական կատարումից, եթե այլ բան նախատեսված չէ ՀՀ օրենսդրությամբ:
- 5.8. Սույն Պայմանագրով չնախատեսված դեպքերում Կողմերն իրենց պարտավորությունները չկատարելու կամ ոչ պատշաճ կատարելու համար պատասխանատվություն են կրում ՀՀ օրենսդրությամբ սահմանված կարգով:

6. ՖՈՐՍ-ՄԱԺՈՐ

- 6.1. Սույն Պայմանագրով պարտավորություններն ամբողջությամբ կամ մասնակիորեն չկատարելու համար Կողմերն ազատվում են պատասխանատվությունից, եթե դա եղել է անհաղթահարելի ուժի

ազդեցության հետևանքով, որը ծագել է սույն Պայմանագիրը կնքելուց հետո, և որը Կողմերը չէին կարող կանխատեսել կամ կանխարգելել: Այդպիսի իրավիճակներ են ջրհեղեղը, հրդեհը, երկրաշարժը, փոթորիկը, սողանքը և բնական այլ աղետները, պայթյունը, պատերազմը, ռազմական և արտակարգ դրություն հայտարարելը, քաղաքացիական հուզումները, գործադուլները, հաղորդակցության միջոցների աշխատանքի դադարեցումը, համաճարակները, էմբարգոն, սույն Պայմանագրի էական պայմանները կարգավորող օրենսդրության փոփոխությունները, պետական մարմինների ակտերը և այլն, որոնք անհնարին են դարձնում սույն Պայմանագրով սահմանված պայմաններով պարտավորությունների կատարումը:

- 6.2. Կողմը, որի մոտ ծագել է ֆորսմաժորային իրավիճակ, պետք է առաջին իսկ հնարավորության դեպքում, սակայն ոչ ուշ, քան նման իրավիճակի վրա հասնելուց 10 (տասը) աշխատանքային օրվա ընթացքում ծանուցի մյուս Կողմին նման իրավիճակի առաջացման, իսկ հետագայում նաև՝ բնականոն պայմանների վերականգնման մասին, հակառակ դեպքում կզրկվի ապագայում ֆորսմաժորային իրավիճակը որպես հիմնավորում օգտագործելու իրավունքից:
- 6.3. Ֆորսմաժորային իրավիճակի վերաբերյալ հանդիպակաց Կողմին ծանուցում ուղարկելու պահից Կողմի համապատասխան պայմանագրային պարտավորությունների կատարման պահանջը համարվում է կասեցված մինչև Պայմանագրի կատարման համար բնականոն պայմանների վերականգնումը:
- 6.4. Եթե արտակարգ ուժի ազդեցությունը շարունակվում է 1 (մեկ) ամսից ավելի, ապա Կողմերից յուրաքանչյուրն իրավունք ունի լուծելու Պայմանագիրը՝ այդ մասին նախապես տեղյակ պահելով մյուս Կողմին:

7. ԳԱՂՏՆԻՈՒԹՅՈՒՆ

- 7.1. Սույն Պայմանագրի վերաբերյալ բանակցություններին կամ Պայմանագրի պայմաններին, այդ թվում՝ արժեքին, Պայմանագրից բխող գործողություններին առնչվող ողջ տեղեկատվությունը (այդ թվում՝ փաստաթղթերը), բացառությամբ զանգվածային տեղեկատվության միջոցներում առկա տեղեկատվության (եթե այդպիսին առկա է) և Պայմանագրի պայմանների կամ դրանց մի մասի ՀՀ օրենսդրությամբ պարտադիր հրապարակման դեպքերի, գաղտնի է և չի կարող տրամադրվել որևէ երրորդ կողմի, բացառությամբ մյուս Կողմի նախապես տրամադրած գրավոր համաձայնության կամ ՀՀ օրենսդրությամբ նախատեսված դեպքերի:
- 7.2. Կողմերը պարտավոր են սույն Պայմանագրի գործողության, ինչպես նաև դրան հաջորդող 3 (երեք) տարիների ընթացքում, ապահովել համապատասխան տեղեկատվության գաղտնիությունը և պատշաճ պաշտպանությունը՝ գործադրելով առնվազն այնպիսի ջանքեր, ինչպիսիք կգործադրեին իրենց իսկ նման տեղեկատվության պաշտպանության համար:

8. ԵԶՐԱՓՈՒԿԻՉ ԴՐՈՒՅԹՆԵՐ

- 8.1. Սույն Պայմանագիրն ուժի մեջ է մտնում երկկողմանի ստորագրման պահից և գործում՝ մինչև Կողմերի համար դրանով նախատեսված պարտավորությունների ամբողջական և պատշաճ կատարումը:
- 8.2. Սույն Պայմանագիրը ստորագրող Կողմերի ներկայացուցիչները սույնով հաստատում են, որ ունեն բոլոր անհրաժեշտ լիազորությունները ստորագրելու սույն Պայմանագիրը և ներկայացնելու Կողմերին Պայմանագրով նախատեսված հարաբերություններում:
- 8.3. Կողմերից որևէ մեկն իրավունք չունի սույն Պայմանագրով սահմանված իր իրավունքներն ու պարտականությունները փոխանցելու երրորդ անձի՝ առանց մյուս Կողմի գրավոր համաձայնության:
- 8.4. Սույն Պայմանագրի յուրաքանչյուր կետ կամ պայման իրենից ներկայացնում է առանձին և ինքնուրույն դրույթ: Եթե Պայմանագրի որևէ դրույթ դատական կարգով կամ այլ իրավասու մարմնի

որոշմամբ ճանաչվի անվավեր կամ կատարման ոչ ենթակա, ապա սույն Պայմանագրի մնացած բոլոր դրույթները կպահպանեն իրենց ուժը, բացառությամբ ՀՀ օրենսդրությամբ նախատեսված դեպքերի:

- 8.5. Սույն Պայմանագրում ցանկացած փոփոխություն և լրացում վավեր է, եթե այն կատարված է գրավոր և ստորագրված՝ Կողմերի ներկայացուցիչների կողմից:
- 8.6. Սույն Պայմանագիրը կարող է վաղաժամկետ լուծվել Պայմանագրով, ՀՀ օրենսդրությամբ նախատեսված հիմքերով և կարգով, ինչպես նաև Կողմերի փոխադարձ համաձայնությամբ: Պատվիրատուի նախաձեռնությամբ Պայմանագրի վաղաժամկետ լուծման հետևանքները կարգավորվում են սույն Պայմանագրով և/կամ ՀՀ օրենսդրությամբ՝ կախված այդպիսի լուծման շարժառիթ հանդիսացած հանգամանքներից: Կատարողի նախաձեռնությամբ Պայմանագրի վաղաժամկետ լուծման դեպքում, Կատարողը պարտավոր է ամբողջությամբ հատուցելու Պայմանագրի վաղաժամկետ լուծման հետևանքով Պատվիրատուին պատճառված վնասները՝ ներառյալ բաց թողնված օգուտը:
- 8.7. Պայմանագրի շրջանակներում Կողմերի միջև փաստաթղթերի, ծանուցումների առաքումը, տեղեկությունների փոխանակությունն իրականացվում է գրավոր կերպով՝ սույն Պայմանագրի վավերապայմաններում նշված ծանուցման հասցեներով փոստային առաքմամբ կամ առձեռն հանձնելու միջոցով, կամ Կողմերի համաձայնությամբ նախատեսված այլ եղանակներով:
- 8.8. Կողմերից յուրաքանչյուրի անվանման, հասցեի, վճարման կամ այլ վավերապայմանների փոփոխության դեպքում, համապատասխան Կողմը պարտավոր է այդ մասին պատշաճ կերպով գրավոր ծանուցել մյուս Կողմին՝ այդպիսի փոփոխությունից 5 (հինգ) աշխատանքային օրվա ընթացքում, հակառակ դեպքում՝ նախկինում տրամադրված վավերապայմաններով արված վճարումները, ուղարկված ծանուցումները համապատասխանաբար կհամարվեն ժամանակին կատարված կամ պատշաճ հասցեով ուղարկված:
- 8.9. Սույն Պայմանագրի կապակցությամբ ծագած վեճերը լուծվում են բանակցությունների միջոցով: Բանակցությունների արդյունքում համաձայնություն ձեռք չբերվելու դեպքում վեճերը լուծվում են դատական կարգով:
- 8.10. Սույն Պայմանագրի առարկային վերաբերող և սույն Պայմանագրով ուղղակիորեն չկարգավորված բոլոր հարաբերությունները կարգավորվում են ՀՀ օրենսդրությամբ:
- 8.11. Սույն Պայմանագիրը կազմված է հայերեն լեզվով, երկու հավասարազոր օրինակներից: Յուրաքանչյուր Կողմին տրվում է Պայմանագրի մեկական օրինակ:

ԿՈՂՄԵՐԻ ՎԱՎԵՐԱՊԱՅՄԱՆՆԵՐԸ ԵՎ ԱՏՈՐԱԳՐՈՒԹՅՈՒՆՆԵՐԸ

Պատվիրատու

«Հայաստանի հանրային

հեռուստաընկերություն» ՓԲԸ

Հասցե՝ ՀՀ, ք. Երևան, Գ. Հովսեփյան 26

ՀՎՀՀ՝ 01540062

«Ինեկոբանկ» ՓԲԸ

Հ/Հ՝ 2050022082671001

Կատարող

«Թայմ Պլուս» ՍՊԸ

Հասցե՝ ՀՀ, Կոտայքի մարզ, Առինջ, Միեր Մկրտչյան

7 փ. 1/5 տ

ՀՎՀՀ՝ 03559635

«Արարատբանկ» ԲԲԸ

Հ/Հ՝ 1510054701750100

Հովհաննես Մովսիսյան

Գործադիր տնօրեն



Հարություն Գրիգորյան

Տնօրեն

